

July 2024

Ka-sara noabirang,

Angni ka-saabegipa segipa aro an-chingni Metropolitan-ni an-chingko wate Gitelona re-angani jaa 2 ong-aha. an-ching sakantinan gisik ra-beani ong-a. Indake ia a-sel ong-aniara an-chingni nokdangrangna, Bishoprangna aro pilak an-chingni mondolirangna rang-gitdikgipa a-sel ong-a. An-ching pilakan uni manggisiko gopani somoio apsan duk mikchi ong-an baksa sakiko on-aha. aro an-ching uni janggi tangmitingo pilak Kristo gita ong-na kam ka-anirangko nikna gita man-a; jekai kangal cha-asigiparangna dakchakani aro mondoliko re-dilanirangko nikna man-aha.

Anga bebera-a, na-simang sakantian Synod-ona re-bana man-pajaoba , internet-rang gita watatgipako TV, aro mobile phone-rango nisoe bakko ra-paaha. Ian dala chona pilakni an-chingni Metropolitan-ko bon-kame watatani aiao inmanpil-ani ong-aha. Uni janggi tangani pilaknan Kristoni nama kattachi nangrimataniko man-aha. Anga bebera-a na-simang sakantian chingni nokdangni mande sakantiko dalgipa screen-o nikenggen, ian altuabeade ong-jachim, indiba Isolni ka-sachakanisa chinga dukni somoio damsan ong-na gita man-aha. Anga na-simang sakantikong mittela pilak chingni duk mikchini somoio chingna bi-achi chingko mangrakatanina.

Anga sal 40-na kingking angni demechik Sarah aro uni nokdang baksa kalimaniko dakaha aro gital Metropolitan-ko songkujaona kingking nokona re-na skang unon dongbaaha. Maina angni segipa siani jamano banga angni dakna nanggni kamrang gnan aro anga angni nokdangni manderangko pilak ka-sabean baksa dakchakaniko on-ahaninaba mittela.

Anga angni nokchi re-baani jamano, anga an-chingni giljani pilak noabirangni gimin chanchiatenga, jerangan chingna ka-sabea aro pangnan chingna bi-chakrongenga; anga chanchia angni segipa siani jamano anga mabranga gita ongen ine angni gimin na-simang chanchiengnaba gnan.

Angni ka-sara noabirang, angni ia chittiko na-simangna seatenganiara anga maikai dongenga aro angni neng-nikani somoio maidake Isol angna ka-sachakaha uko ui-na gita on-aha. An-ching ia papo ga-akgimin a-gilsako janggi tangengon, an-ching sakantioan neng-nikanirangko chagronge ui-na gita man-a aro an-chingni janggi tangani bakroaniko bakkandikataniona gimaataha. Iako anga na-simangna seatengon, haida salsao nangni janggi tanganio dakchakani ong-naba gnan.

**Chingni nokdangni sakanti, sudrangona kingking, chinga bilongen Metropolitan-na ka-pakbea.** Ua dingtang dingtang biaprangchi billongen songreabea, indiab ua nokchina re-bapilrongachim, indiba da-ode chinga uko grongna ba niktaina gita Salgiona sokangesa grongna manaignok. Angni ui-ani gita Metropolitan aro angni bia ka-ani bilsa 50 ong-na gita sal 12 Nanguachim anga bebera-a chingni janggi tangrimanio ia salona kingking Gitelna dangdike on-aha. Indake ong-engon, chingni janggi tangrimanio chinga ia ranggitik a-sel ong-e sianiko man-e saksa sakgipinko ba chinga ia a-gilsako agangolpogrike bonkame goodbye ine agangrikangna gitaba man-angjaha.

**Indake angni ui-na man-gijagiparang bangan gnan,** anga angni gisiko sing-on, anga ua pilak aganchakaniko man-na gita jringjrotni janggiona napjokosa man-aigen ine ui-na gita man-aha. Uni gimin anga chugimik angni ka-donganiko bilakgipa Gitelosa donaha. Maina Uni kattao agana, Uan namgipa ong-a aro Uan ka-sagipa ong-a aro mingsakoba daksretgipa ong-ja.

**Angni pilak duk mikchini somoio aro angni an-tangko ia a-gilsako saksan dake nikengon,** Gitel Jisuara angna simsakama? Oe, Isolni kattao indake ku-rachaka; Ua angko simsake ka-dimeataniko on-chongmota, Maina Uni A-gilsako dongmittingo pilak Duk mikchirangko Cha-totman-aha jejeraangko anga dao cha-grongengachim. Maina Uni chisolon pilak angni ka-abeaniko aro duk mikchirangko Uan ra-angaha.jensalo anga grapa aro ia apbalgipa a-gilsako saksan onga ine jajrengmittingo Uan gimikkon ma-sitoka

Anga angni simbrae sikkimaoniko basakon badeangangen ine anga da-o chanchienga? An-chingni janggi tanganio an-ching duk mikchiko chagronge janggi tangeming cheaniko man-na gita Isol an-chingko ong-ataha.

Daud an-tangba bangbea nengnikani aro dakmajoanirangko cha-grongaha. Gitrang 23:3-o indake agana *“Ua angni janggiko ansaoata”* Anga ia somoirango Gitrang 23 aro minggipin gitrango pangchake bi-jringaniko dakenga, aro anga angni ka-tong gimikchi bebera-a Uan kakketgipa ong-a aro uan pilak Uni ku-rachakanirangko angna chusokatgen, maina angni ka-donganiko Unon donmanaha.

**Anga Gitelo ka-donga, salsao biap ge-sao damsan ong-gen.** Indake pilak chanchianiosa anga an-tangko ka-dimeaniona ra-na gita man-a; ong-jaode anga an-tangni dukoni ka-dimeaniona ra-bana gita man-jachim. Indake Ua salantio angni re-rurano angko dila aro angni bilakna nanganirango angko bilakata; anga ia salrangko iarango chanchibewalen aro Gitelo ka-dimeanirangkon chanchie salrangko re-atenga aro basakobade angni ka-sabegipa su-drangrang baksa somaiko re-atenga.

**Angna dakchakbatsranggipara maiamanchaaoni ong-a ba rebara jerangan angni ka-donganirangko Isolni kattao chugimik pangchake aro uarangko gipatna man-gen.** indake ia neng-nikanirangko anga an-tangni obostani somoion aro pilak mondolini gita nengnikanirangko cha-tote nina gita skie ra-na nanggen. Angni ka-sara noabirang, anga na-simangko didianiko on-enga, na-simangni janggi tangao dal-a obostako chagrongna skangan nangko dake nianiko chagrongna skie ra-bo. Mingsa Isolni kattao pangchake anga Gitel Jisuni ku-rachakanio angni ka-dongani aro pangchakaniko dona: (Ibrirangna 13: 5-O indake agana) *“Anga maming dakeba nang-ko watjawa, aro mamung dakeba watgaljawa”* la kattarango pangchake, angna mikkangchi mai ong-gen angni kenanirangko angoniko chel-ataha.

**Angna Isolni ka-saani gimin aro Uni ka-sachakani gimin anga na-simangna aganna.** Angni segipani Gitel baksa re-anga saloni da-alni salona, Salgini pagipa angni ka-tongo gapataha aro Uni dongpaanichi Ua angna tom-tomaniko on-aha. Beben angni mikgrononi mikchirang ong-a indiba ua tom-tomaniko on-achi anga walo name tusina gita man-a; indake angni ka-tongo maming kenani dongjaha. Anga pangnan Isolni simsakanio aro Uni ka-sachakanio ka-donga.

**Metropolitan bilakgipa aramrangchi saki on-ani gimin Ibrirangna 12:1 o agangipa kattao pangchake pangnan aganronga,** jean an-chingni samtangtango donga. Anga chanchiatenga, ua uni ge-etanirang gita aro uni niksamsowanirangko an-ching chusokatengama, chusokatjaenga, ua an-chingko aramoni niate dongenga.

Angni ka-sara noabirang, an-chingni janggi tanganio an-ching changsaba Isolni kattako knakugijagiparangna agangenchim ong-ode, an-ching Gitel Jisuko aro gisikni pagipako mandera-beani ong-a. Uni gimin hai an-ching bebe aro kakketo an-chingni metropolitan Theophilus-na aro pilak bishoprangna aro dilgiparangna bi-na. jerangan an-chingni mikkango ong-e an-chingko dilenga, jedakode uamang Isoloni nama gisik baksa an-chingko aro mondoliko mikkangchi dilangna gita man-gen. An-ching noabirang ong-e, uamangni dilani aro ku-patianiko an-ching aro mandoli pangnan ra-na gita nanga.

**Hai an-ching ka-donga gnang janggi tangna.**

Angni ka-sara noabirang, ia angni chittio angni janapaniarangara, re-anggipa jagnio anga maikai salrangko re-ataha uko na-simangna ui-atani ong-a. Je an-chingni Gitelan tangchapilani giminan ku-rachakahachim, uan an-chingna duk mikchioni katchataianiko on-taigen ine anga bebera-a. Unon an-ching an-chingni Metropolitan aro an-chingna skang re-angsoyiparang baksa ong-gen. Indake an-ching sakantian ua somoio an-chingko piokgipani sambao pangnan ong-gen.

Ka-sararang, anga na-simangna Kristo Jisuo ka-sara aro anga na-simangna pangnan Isolo bi-rongenga.

Na-simangni Kristoo noabi,

Gisela Yohannan

